

ଫିଲିମନଙ୍କ ନିକଟକୁ ପ୍ରେରିତ ପାଠକଙ୍କ ପତ୍ର ପିଲିମନ୍ ଲାଗାଂ ପକ୍ୟାତି ପାଠକୃତି ଆକି ପିଲିମନ୍ ଆକି ବିଷ୍ଣେ ପାଦେକ୍

ଈତୁ ପିଲିମନ୍ ଆକି ପକ୍ୟାତି ପାଠକୃତି ହୁକେ ଲେକା ଆଜି ମାତାତ୍ ୧:୧ ଏତେକାତ୍ତ୍ତ୍ ଇଦାଂ ଲେକିକିତାନ୍ ହେଞ୍ଜାନ୍ ଜଇଲ୍ ଇଞ୍ଜି ଗେହ୍ଯା ଆଜି ମାତାନ୍, ଇନାକା ଅରତ୍ ଆଜି ମାନ୍‌ଗାନାତ୍ ହେଞ୍ଜାନ୍ ରମ୍‌ତାଂ ଇଦାଂ ଲେକିକିତାନ୍ନା । ଜଦି ହେଞ୍ଜାନ୍ ରମ୍‌ତ ମାତାନ୍ କ୍ରିଷ୍ଟତି ଜଲମନ୍‌ନି ଆଦିକ୍ ଆତିସ୍ ତିନକଡ଼ି ଏକ୍ ୬୧ ବାହୁଁ ପାତେ ଇ ଆକି ଲେକି କିଜି ମାନ୍‌ଗାନାନ୍ । ଇନାକା ହେ ସମାନ୍‌ଞ୍ଜେଡ଼ାଲିଂ କଲସିୟ୍ ମଣ୍ଡଲିତିଂ ଲେକି କିଜି ମାନ୍‌ଗାନାନ୍ ।

ହେଞ୍ଜାନ୍ ଇ ଆକି ପିଲିମନ୍ ତରୁନି ରଞ୍ଜାନ୍ ମାନାୟ୍‌ତିଂ ଲେକିକିତାନ୍ନା । ପିଲିମନ୍ ରଞ୍ଜାନ୍ ମଣ୍ଡଲି ମେମର୍ ଆରି ଆଡ଼ିଏନ୍ ହାତକାର ମାତାନ୍ । ପାଠକ୍ ଲେକିକିନାନ୍ ଜେ, ହେଞ୍ଜାନ୍ ଅନିସିମସତିଂ ଦାଣ୍ଟ୍ ହିମେର୍, ଇନେରକି ପିଲିମନ୍ ତାଂ ମ୍ପୁସି ଦେହା ହନ୍ତି ମାତାନ୍ । ରମ୍‌ନି ବିଦି ଇସାବ୍‌ରେ ପିଲିମନ୍ ଅନିସିମସତିଂ ହାକି ଦାଣ୍ଟ୍ ହିନି ଆଦିକାର ମାତାତ୍ ।

ଅନିସିମସତିଂ କ୍ରିଷ୍ଟାନ୍ ଟଣ୍ଡେନ୍ ବାବ୍ରେ ଇଟ୍‌ନି କାଜିଂ ଇନେସ୍ ରାଜି ଆନାର ହେଦାଂ କାଜିଂ ପିଲିମନ୍‌ତିଂ ପାଠକ୍ ଗଞ୍ଜାରି କିତାନ୍ନା । ପାଠକ୍ ଅନିସିମସତିଂ ତା ବାହାତ ହେବାକାମାୟ୍ କିନି କାଜିଂ ଆଦିକାର୍ ହିନି କାଜିଂ ବୁଜାୟ୍ କିତାନ୍ ୧:୧୩-୧୪

ପିଲିମନ୍ ଆକି ବିଷ୍ଣେନି ରାହାଣ୍

- ୧ ପାଠକ୍ ପିଲିମନ୍‌ତିଂ ବାନ୍ଦାୟ୍ କିନାନ୍ ୧:୧-୩
- ୨ ପାଠକ୍ ଅନିସିମସତି ତାପଣ୍ଡାକ୍ ପିଲିମନ୍‌ତିଂ ରଞ୍ଜାକ୍ କ୍ରିଷ୍ଟାନ୍ ଟଣ୍ଡେନ୍ ବାବ୍ରେ ଇଟ୍‌ଦେଂ ଇନାନ୍ ୧:୪-୨୧
- ୩ ପାଠକ୍ ହେଞ୍ଜାନ୍‌ତି ଆରେ ରଗ ହାନି ବିଷ୍ଣେ ମାନ୍‌ବାବ୍‌ନା ଆରି ବାନ୍ଦାୟ୍ କିଜି ଝିହ୍‌ନାନ୍ ୧:୨୨-୨୫

ପିଲିମନ୍ ଲାଗାଂ ପକ୍ୟାତି ପାଉଲ୍ତି ଆକି

୧ କ୍ରିଷ୍ଟ ଜିସୁତି କାଜିଂ ବନ୍ଦି ଆଜି ମାଟିଲେ ଆନ୍ ପାଉଲ୍, ଟଣ୍ଡେନ୍ ତିମତି ମା ୱାରିନିକାନ୍ ଆରି ହାଙ୍ଗଦାକାନ୍ ପିଲିମନ୍ ତାଂ ଆକି ଲେକି କିନାଙ୍ଗା, ୨ ଆରେ, ତଣ୍ଡେଲ୍ ଆପ୍ପିୟା ଆରି ମା ହୁଦାଂ ମେଲ୍ୟା ଆକି ପପ ଆରି ମି ଇଞ୍ଜ ନି ମଣ୍ଡୁଲି ଲାଗାଂ ଆକି ଲେକିକିନାଙ୍ଗା ।

୩ ମା ଆବା ଇସ୍ତର୍ ଆରି ମାପୁ ଜିସୁ କ୍ରିଷ୍ଟତାଙ୍ ଦୟା ଆରି ସୁସ୍ତା ମି କାଜିଂ ଆଏଡ଼ ।

ପିଲିମନ୍ତି ଜିଉନନାକା ଆରି ପାତର୍

୪ ଟଣ୍ଡେନ୍ ପିଲିମନ୍ ନା ପାର୍ତାନାତ ନି ତର୍ ଲେକି କିଜି ସବୁ ୱେଡାଙ୍ଗ ନା ଇସ୍ତର୍ତିଂ ଜଞ୍ଜର୍ କିନାଙ୍ଗା, ୫ ଇନାକିଦେଂକି ଆନ୍ ୱେଡାଙ୍ଗନା, ମାପୁ ଜିସୁତାକେ ମିଦାଂ ଏରେଜାଣ୍ ପାତର୍ ଆରି ଇସ୍ତର୍ତିଂ ମାନିକିନି ସାଦୁର୍ କାଜିଂ ମିଦାଂ ଏରେକ୍ ୱାରି ! ୬ ଇନେସ୍ ମି ପାତର୍ ନି ମେହାଣ୍, ମାଙ୍ଗେଙ୍ଗ୍ ହିୟାଜି ମାନି ୱିଜୁ ହାଉଦି ବିସ୍ତେ ମେହାତି ଗିଆନ୍ ହୁକେ କ୍ରିଷ୍ଟି ପାକ୍ୟାତ କାମାୟ୍ ଆନାଙ୍ଗା । ୭ ଇନାକିଦେଂକି, ଏ ଟଣ୍ଡେନ୍, ପୁଇପୁୟା ସାଦୁର୍ତି ଜିବୁନ୍ତ ମି ହୁକେ ବାଡ଼କାସ୍ ପାୟା ଆଜି ଆନ୍ ନି ଜିଉନନାକା ବେସି ଦୁକ୍ସାରାୟ୍ ଆରି ୱାରି ଆନାଙ୍ଗ ।

ଅନିସିମଙ୍ଗ୍ତି କାଜିଂ ଗଞ୍ଜାରି

୮ ଲାଗିଂ ଇନାକା ହାଉଦାକା, ହେ ବିସ୍ତେ ମିଙ୍ଗେଙ୍ଗ୍ ବଲ୍ ହିନି କାଜିଂ କ୍ରିଷ୍ଟି ଆଡ଼ିଏନ୍ ଲାକେ ଆତିସ୍ପା ନା ବାତର୍ ସାସ୍ ମାନାଡ଼, ୯ ଆତିସ୍ପା ଆନ୍ ରୁଡ଼ହି ପାଉଲ୍, ଜିଉନନି କାଜିଂ ମିଙ୍ଗ୍ ଗଞ୍ଜାରି କିଦନାଙ୍ଗା, କ୍ରିଷ୍ଟ ଜିସୁତି କାଜିଂ ନଙ୍ଗ୍ ଗେହୟା ଆତାଙ୍ଗନା ଜେ ଆନ୍, ୧୦ ଶନାଦାଂ ଏଲେଙ୍ଗ୍ ଗାଉୟା ଆତି ଅବସ୍ତାତ ନାତାଙ୍ଗ୍ ହଡ଼ତି ନା ବପା ଅନିସିମ୍ କାଜିଂ ମିଙ୍ଗ୍ ଗଞ୍ଜାରି କିଦନାଙ୍ଗା । ୧୧ ହେ ଆଗେ ମି କାଜିଂ କାମାୟ୍ ଆଡ଼ଞ୍ଜାକାନ୍ ମାତାନ୍, ମତର୍ ନଙ୍ଗୟ୍ ମିଦାଙ୍ଗ୍ ଆରି ନାଦାଂ ହାରି ଉପକାର୍ ଆନାତା ।

୧୨ ହେଞ୍ଜାନ୍ ତ ନା ଜିବୁନ୍ତ ଲାକେ; ଆନ୍ ତାଙ୍ଗେଙ୍ଗ୍ ମି ତାକେ ମାସ୍ତି ପଙ୍ଗାନାଙ୍ଗା । ୧୩ ନେକ୍ରିକାବୁର୍ କାଜିଂ ଗାଉଡ଼ିତିହିଂ ତାଙ୍ଗେଙ୍ଗ୍ ନି

☆ ୧:୧୦ ୧:୧୦ କଲସିୟ ୪:୯.

ବାହାତ ନା ହେବା କିନ୍ତି କାଜିଂ ଲାଗେ ଇଡ଼ିଦେଂ ନା ମାନ ଆନାତା, ୧୪ ମତର୍ ମି ଦାନ ଅଞ୍ଜାଦାଂ ଆନ୍ ଇନାକା କିଦେଙ୍ଗ୍ ମାନ୍ କିଞ୍ଜାତାଂ, ଇନେସ୍ ମି ହାରଦି କାମାୟ୍ ବଲଡ଼କାର୍ କିତି ଲାକେ ଆଞ୍ଜାଦାଂ ଜାରମାନ୍ତାଂ ଆଏଡ଼ ।

୧୫ ଇନାକିଦେଂକି ଆନାଡ଼ପା, ଇନେସ୍ ଏପେଙ୍ଗ୍ ତାଙ୍ଗେଙ୍ଗ୍ ଆରେ ଆଡ଼ିଏନ୍ ଲାକେ ଗାଟାଞ୍ଜାଦାଂ ନଲେ ଆଡ଼ିଏନ୍ତାଂ ଗାଜାକାନ୍, ଇତିସ୍, ରଞ୍ଜାନ୍ ଖାରିନି ଟଣ୍ଡେନ୍ ଲାକେ ଝିଙ୍ଗ୍ କାଡ଼୍ ପାୟାଦେଂ ଆଡ଼ନାଦେର୍, ଇଦାଂ କାଜିଂ ଅନିସିମସ୍ ଅଲପ୍ କାଡ଼୍ କାଜିଂ ମିଂ ତାଂ ବିନେ ଆଜି ମାଟାନ୍; ୧୬ ବେସିକିଜି ଆଡ଼ିୟା ନାଞ୍ଜାନ୍ ରଞ୍ଜାନ୍ ଖାରିନି ଟଣ୍ଡେନ୍, ଲାଗିଂ, ଗାଗାଡ଼ତ୍ ଆରି ପା ମାପୁତାକେ ମି କାଜିଂ ଆଞ୍ଜିତିସ୍ ଏଚେକ୍ ଆଦିକ୍ ଲାଡ଼ ଆଡ଼ତ୍ ।

୧୭ ଲାଗିଂ ଜଦି ଏପ୍ ନାଙ୍ଗେଙ୍ଗ୍ ରଞ୍ଜାନ୍ ମେହାଣ୍ ଇଞ୍ଜି ବାବି କିୟା, ତା ଆଡ଼ିସ୍ ନାଙ୍ଗେଙ୍ଗ୍ ଇଡ଼ଦିତି ଲାକେ ହେଦେଲିଂ ଇଟାଟ୍ । ୧୮ ଜଦି ହେଞ୍ଜାନ୍ ମି କାଜିଂ ଇନାକା ଅନୟାୟ୍ କିଜି ମାନାନ୍ କି ମି ତାକେ ରିଣ୍ ଆଜି ମାନାନ୍, ତେବେ ହେଦାଂ ନା ଇସାବ୍ତ ଲେକିକିୟା; ୧୯ “ଆନ୍ ପାଡ଼ଲ୍ ଜାର୍ କେଇଦାଂ ଇଦାଂ ଲେକି କିଜି ହିଦ୍ନାଙ୍ଗା, ଆନ୍ ହେଦାଂ ହୁଜା ଆନାଙ୍ଗ୍,” ଏପେଙ୍ଗ୍ ନିଜେ ଜେ ନା ଲାଗାୟ୍ ସବୁ ଦିନ୍ନି ରିଣ୍ୟା, ଇ ବିସ୍ତେ ଆନ୍ ଇଞ୍ଜେଙ୍ଗ୍ ମାନ୍ କିଡ଼ଙ୍ଗା ମି ଜିବୁନ୍ ନା ତାକେ ରିଣ୍ । ୨୦ ଆଁ, ଟଣ୍ଡେନ୍, ମାପୁ ଲାହାଂ ରଚେମାଞ୍ଜି ମି ହୁକେ ନା ଲାବ୍ ଆଏଡ଼, କ୍ରିସ୍ଟ ତାକେ ନା ଜିବୁନ୍ତ ସୁସ୍ତା ହିଦା । ୨୧ ନି ବଲ୍ତାଂ ନା ପାତ୍ ମାଟିଲେ ଆନ୍ ନିଙ୍ଗେଙ୍ଗ୍ ଲେକିକିଦ୍ନାଙ୍ଗା; ଆନ୍ ପୁନାଙ୍ଗ୍ ଜେ, ଆନ୍ ଇନାକା ଇଞ୍ଜନାଙ୍ଗା ଏପେଙ୍ଗ୍ ତା ତାକେଣ୍ଡାଂ ଆଦିକ୍ ପା କିନାଦେର୍ । ୨୨ ହେ ହାଙ୍ଗେ ହାଙ୍ଗେ ନା ମାନି ବାହା ପା ରଚ୍ଚି ଇଟାଟ୍, ଇନାକିଦେଂକି ମି ପାର୍ତାନା ହୁକେ ଏପେଙ୍ଗ୍ ନାଙ୍ଗେଙ୍ଗ୍ ମାସ୍ଦି ଗାଟାନାଦେର୍, ଆନ୍ ଇଦାଂ ଆହା କିନାଙ୍ଗା ।

ହାରିହାରା ଜୁଞ୍ଜା

୨୩ କ୍ରିସ୍ଟ ଜିସୁତି କାଜିଂ ତାଙ୍ଗେଙ୍ଗ୍ ନା ହାଙ୍ଗ୍ଦାକାନ୍ ରଚେ ଗାଟ୍ୟା ଆତାକାନ୍ ଏପାପ୍ରା ଆରି ନା ହାଙ୍ଗ୍ଦାକାର୍ ୨୪ କ୍ରିସ୍ଟ ଜିସୁ କାଜିଂ ନା ହାଙ୍ଗ୍ଦି ବନ୍ଦି ଏପାପ୍ରା ଆରି ନା ହାଙ୍ଗ୍ଦାକାର୍ ଇନେନ୍ ମାର୍କ୍, ଆରିସ୍ତାର୍କ୍, ଦିମା ଆରି ଲୁକ ନିଙ୍ଗେଙ୍ଗ୍ ଜୁଞ୍ଜା ଡାଶାୟ୍ କିଦ୍ନାନା ।

୨୫ ମା ମାପୁ ଜିସୁ କ୍ରିଷ୍ଟି ଉପକାର ମି ଝିଜାକାର ଜିରୁନ୍ତ ଆଏତ ।

ସତ୍ ବଚନ୍
The New Testament in the Pengo language of India:
ସତ୍ ବଚନ୍

copyright © 2020 The Word for the World International

Language: Pengu (Pengo)

Contributor: The Word for the World International

ସତ୍ ବଚନ୍
ପୁନି ନିର୍ମାଣ , 2020

The New Testament in Pengo Language.

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-13

PDF generated using Haiola and XeLaTeX on 13 Jul 2024 from source files dated 14 Apr 2023

347138c8-2363-58d9-a1b0-0259691b7d43